

雜阿含經

卷第十五

宋天竺三藏求那跋陀羅譯

(三七九)

如是我聞：

一時，佛住波羅捺鹿野苑中仙人住處。

爾時，世尊告五比丘：

「此苦聖諦，本所未曾聞法，當正思惟，時生眼、智、明、覺。

此苦集、此苦滅、此苦滅道跡聖諦，本所未曾聞法，當正思惟，時生眼、智、明、覺。

「復次，苦聖諦智當復知，本所未聞法，當正思惟，時生眼、智、明、覺。

苦集聖諦已知當斷，本所未曾聞法，當正思惟，時生眼、智、明、覺。

「復次，苦集滅，此苦滅聖諦已知，當知作證，本所未聞法，當正思惟，時生眼、智、明、覺。

復以此苦滅道跡聖諦已知當修，本所未曾聞法，當正思惟，時生眼、智、明、覺。

「復次，比丘！此苦聖諦已知，知己出，所未聞法，當正思惟，時生眼、智、明、覺。」

復次，此苦集聖諦已知，已斷出，所未聞法，當正思惟，時生眼、智、明、覺。

「復次，苦滅聖諦已知，已作證出，所未聞法，當正思惟，時生眼、智、明、覺。」

復次，苦滅道跡聖諦已知，已修出，所未曾聞法，當正思惟，時生眼、智、明、覺。

「諸比丘！我於此四聖諦三轉十二行不生眼、智、明、覺者，我終不得於諸天、魔、梵、沙門、婆羅門聞法眾中，為解脫、為出、為離，亦不自證得阿耨多羅三藐三菩提。」

我已於四聖諦三轉十二行生眼、智、明、覺，故於諸天、魔、梵、沙門、婆羅門聞法眾中，得出、得脫，自證得成阿耨多羅三藐三菩提。」

爾時，世尊說是法時，尊者憍陳如及八萬諸天遠塵離垢，得法眼淨。

爾時，世尊告尊者憍陳如：「知法未？」

憍陳如白佛：「已知。世尊！」

復告尊者憍陳如：「知法未？」

拘隣白佛：「已知。善逝！」

尊者拘隣已知法故，是故名阿若拘隣。

尊者阿若拘隣知法已，地神舉聲唱言：

「諸仁者！世尊於波羅捺國仙人住處鹿野苑中三轉十二行法輪，諸沙門、婆羅門、諸天、魔、梵所未曾轉。多所饒益，多所安樂。哀愍世間，以義饒益，利安天人。增益諸天眾，減損阿修羅眾。」

地神唱已，聞虛空神天、四天王天、三十三天、炎魔天、兜率陀天、化樂天、他化自在天展轉傳唱，須臾之間，聞于梵天身。梵天乘聲唱言：

「諸仁者，世尊於波羅捺國仙人住處鹿野苑中三轉十二行法輪，諸沙門、婆羅門、諸天、魔、梵，及世間聞法未所曾轉。多所饒益，多所安樂。以義饒益諸天世人，增益諸天眾，減損阿修羅眾。」

世尊於波羅捺國仙人住處鹿野苑中轉法輪，是故此經名轉法輪經。

佛說此經已，諸比丘聞佛所說，歡喜奉行。

【經文資訊】大正藏第 02 冊 No. 0099 雜阿含經

佛說三轉法輪經

三藏法師義淨奉 制譯

如是我聞：

一時，薄伽梵在婆羅痾斯仙人墮處施鹿林中。爾時，世

尊告五苾芻曰：

「汝等苾芻！此苦聖諦，於所聞法，如理作意，能生眼智明覺。

「汝等苾芻！此苦集、苦滅、順苦滅道聖諦之法，如理作意，能生眼智明覺。

「汝等苾芻！此苦聖諦是所了法，如是應知，於所聞法如理作意，能生眼智明覺。

「汝等苾芻！此苦集聖諦是所了法，如是應斷，於所聞法如理作意，能生眼智明覺。

「汝等苾芻！此苦滅聖諦是所了法，如是應證，於所聞法如理作意，能生眼智明覺。

「汝等苾芻！此順苦滅道聖諦是所了法，如是應修，於所聞法如理作意，能生眼智明覺。

「汝等苾芻！此苦聖諦是所了法，如是已知，於所聞法，如理作意，能生眼智明覺。」

「汝等苾芻！此苦集聖諦是所了法，如是已斷，於所聞法，如理作意，能生眼智明覺。」

「汝等苾芻！此苦滅聖諦是所了法，如是已證，於所聞法，如理作意，能生眼智明覺。」

「汝等苾芻！此順苦滅道聖諦是所了法，如是已修，於所聞法，如理作意，能生眼智明覺。」

「汝等苾芻！若我於此四聖諦法未了三轉十二相者，眼智明覺皆不得生，我則不於諸天魔梵、沙門婆羅門一切世間，捨離煩惱，心得解脫，不能證得無上菩提。」

「汝等苾芻！由我於此四聖諦法解了三轉十二相故，眼智明覺皆悉得生，乃於諸天魔梵、沙門婆羅門一切世間，捨離煩惱，心得解脫，便能證得無上菩提。」

爾時世尊說是法時，具壽憍陳如及八萬諸天，遠塵離垢，得法眼淨。

佛告憍陳如：「汝解此法不？」

答言：「已解。世尊！」

「汝解此法不？」

答言：「已解。善逝！」

由憍陳如解了法故，因此即名阿若憍陳如（阿若是解了義）。

是時地居藥叉聞佛說已，出大音聲，告人天曰：

「仁等當知，佛在婆羅痾斯仙人墮處施鹿林中，廣說三轉十二行相法輪，由此能於天人魔梵、沙門婆羅門一切世間，為大饒益，令同梵行者，速至安隱涅槃之處，人天增盛，阿蘇羅減少。」

由彼藥叉作如是告，虛空諸天四大王眾皆悉聞知。如是展轉於剎那頃盡六欲天，須臾之間乃至梵天普聞其響，梵眾聞已，復皆遍告，廣說如前，因名此經，為三轉法輪。

時五苾芻及人天等，聞佛說已，歡喜奉行。

【經文資訊】大正藏第 02 冊 No. 0110 佛說三轉法輪經

佛說轉法輪經

後漢安息三藏安世高譯

聞如是：

一時，佛在波羅捺國鹿野樹下坐，時有千比丘、諸天神，皆大會側塞空中，於是有自然法輪飛來，當佛前轉。佛以手撫輪曰：

「止！往者吾從無數劫來，為名色轉，受苦無量，今者癡愛之意已止，漏結之情已解，諸根已定，生死已斷，不復轉於五道也。」

輪即止。

於是，佛告諸比丘：

「世間有二事墮邊行，行道弟子捨家者，終身不當與從事。」

何等二？一為念在貪欲，無清淨志；二為猗著身愛，不能精進。是故退邊行，不得值佛道德具人。

若此比丘不念貪欲、著身愛行，可得受中。如來最正覺，得眼得慧，從兩邊度，自致泥洹。

何謂受中？謂受八直之道，一曰正見，二曰正思，三曰正言，四曰正行，五曰正命，六曰正治，七曰正志，八曰正定。

若諸比丘本末聞道，當已知甚苦為真諦，已一心受眼、受禪思、受慧見，覺所念令意解。當知甚苦習盡為真諦，已受眼觀、禪思、慧見，覺所念令意解，如是盡真諦。

何謂為苦？謂生老苦、病苦，憂悲惱苦，怨憎會苦，所愛別苦，求不得苦，要從五陰受盛為苦。

何謂苦習？謂從愛故，而令復有樂性，不離在在貪慧欲愛、色愛、不色之愛，是習為苦。

何謂苦盡？謂覺從愛復有所樂，婬念不受，不念無餘無婬，捨之無復禪，如是為習盡。

何謂苦習盡欲受道？謂受行八直道，正見、正思、正言、正行、正命、正治、正志、正定，是為苦習盡受道真諦也。

「又是，比丘！」

苦為真諦，苦由習為真諦，苦習盡為真諦，苦習盡欲受道為真諦。

若本在昔未聞是法者，當受眼觀禪行，受慧見，受覺念，令意得解。

若令在斯未聞是四諦法者，當受道眼、受禪思、受慧覺，令意行解。

若諸在彼不得聞是四諦法者，亦當受眼、受禪、受慧、受覺，令意得解。

是為四諦三轉，合十二事。知而未淨者，吾不與也。

一切世間諸天人民，若梵、若魔、沙門、梵志，自知證已，受行戒、定、慧、解、度知見成，是為四極。

是生後不復有，長離世間，無復憂患。」

佛說是時，賢者阿若拘鄰等及八千姪天，皆遠塵離垢，諸法眼生。

其千比丘漏盡意解，皆得阿羅漢，及上諸習法應當盡者，一切皆轉。

眾祐法輪聲三轉，諸天世間在法地者，莫不遍聞，至于第一四天王、忉利天、焰天、兜術天、不驕樂天、化應聲天，至諸梵界，須臾遍聞。

爾時，佛界三千日月，萬二千天地，皆大震動，是為佛眾祐，始於波羅捺，以無上法輪轉未轉者，照無數度諸天人，從是得道。

佛說是已，皆大歡喜。

【經文資訊】大正藏第 02 冊 No. 0109 佛說轉法輪經